


WAAMINI

 Masi muhaana orumeela omwaamini Muluku, wira evare muteko. Munnona? Tivo nyuwo mookhalana ohihimuwa wanyu muhina mwa nyuwo. Ohihimuwa wanyu ori muhina mwa nyuwo, muroohoni mwanyu.

² Vano, moosuwela, okathi Yesu okhwiyaaawe vamwiikimanyo, “Munepa Awe waahikhuruwela mookhwaani khulaleerya minepa s’atthu saatthukweliwe, sahaarukunxale murima mahiku a ovilela wa Nowe.” Erutthu Awe yaaronwe mmahiye. Masi, Owo ohinatthi okhwa, Owo aavaherenrye Erooho Awe mmatatani mwa Muluku. Mmatatani. . . “Mmatatani mw’Anyu kinnivahererya Erooho Aka.” Tivo, moone, Erooho Awe yaaronwe wa Muluku; munepa Awe waaronwe omooroni; erutthu Awe yaaronwe mmahiye.

³ Vano, Erooho ele yaari mwa Yoowo yaari Erooho ya Muluku. “Erooho ele, khalayi ni inamuna sinci-ene, yaahaattikitthela maprofeta, wira yaaruhele Mutthaka atthu; mahiku ookiserya, mwa Kristu; nto vano, mahiku ala va, mwa Ehapari yooreera.” Vano, namwaakhela Kristu mmurimani mwahu, ti vaavo eri yothene emphavelaahu. Vo eri Ekumi Ehinimala.

⁴ Vano, Kristu khaakhanle otthikaka mpakha mahiku mararu omaliheriwa. Okhala wira, Erooho Awe yaari ottuli wa ekurtiina, ntoko ekhottiheryo, *sa*, Owo ahaakhanlyawe ovikanaka ekhottiheryo eyo, okhala wira yaari Masu a Muluku oolavuliwa, wira, “Owo aahaana okhala mmahiye mahiku mararu othana n’uhiyu.” Vano, Owo khaakhanle otthikaka mpakha mahiku awo mararu othana n’uhiyu ovira. Vano vamalenlyaya mahiku mararu othana n’uhiyu, Erooho Awe yaahitaphuliwa. Eyo yaaronwe elukamaka mmunepani Mwawe, nto munepa Awe khutthika khukuxa erutthu, khumaliheriwa etthu Owo aahimaly’awe, “Kookhalana owerya w’ovaha ekumi Aka. Kookhalana owerya w’okuxa-tho. Kookhalana owerya.”

⁵ Vano, khula mmosa a nyuwo ookhalana owerya, enamuna emosaru, okhala wira nyuwo mwa aana alopwana n’athiyana a Muluku. Ni Erooho yeeyo eri mwa nyuwo, voosiis’ula, Erooho Yoowaarya eri mwa nyuwo voosiis’ula, Erooho Yoowaarya emosaru yeeyo enimoovenxani. Tivo, mookhalana owerya wo otthikela ovenya.

⁶ Okathi onkhwaanyu, munepa anyu onrowa mo—mo. . . vathi v’altaari a Muluku, kahi mu. . . onlukama Ohoolo wa Muluku. Vano, erooho anyu enoorowa wa Muluku, masi khamunwerya otthika. Muupuwele, mBibiliiani, ehimmye wira erooho. . . “Minepa siri vathi v’altaari, sinnikhuwela, ‘Pwiya, mpakha liini, mpakha liini?’” Ni awo khiyaakhanle

otthikaka mpakha Soolempwa omaliheriwa, ni, ntoko Kristu, khaakhanle otthikaka mpakha Soolempwa omaliheriwa. Vano, nuumala, sothene saakhumelenle, ohaawa wothene omala, ni axinna ohaawa itthu imosaru, ahiiso hiyo ohaawa ntoko awo sihaawalyaya, ni sikina; nto, nihiku nenlo, munoosuwela vekeekhai vatthu vavitiwaanyu, erooho anyu enootaphuliwa ni Muluku ni enimoorwa mmunepani.

⁷ Vano, munepa ti mpantte anyu owo onsuwela ni oniwa, akhili anyu. Munnuupuwela yoowoona kaakhalanne aka woohikhala khalayi, ahiiso okuxiwa, khurowa nipuro nle khuwoona atthu ale? [Muthukumano oniira, "Amen."—Mol.] Vano, erooho anyu enootthikela erutthu eyo, ni eyo—muthinto yoowo w'erutthu, munepa, yeeyo ekhanle erutthu ehimpavela olya ni sikina. "Emp'ela ya vathi va yakurumuwa vale, nookhalana ekina ennilipelela," erutthu ya wirimu. Nto ni erooho yeeyo, ni munep'owo ni erutthu ya wirimu, nyuwo munoohihimuwa mw'erutthuni mu y'ephattu wa Mileeniyu ele yuulupale. Munnona? Mookhalana owerya mwa nyuwo vano, wo wira yeeyo, naanaano va, masi owerya iwo murinaanyu mwa nyuwo vano waamuwerya opaka olumwenku musya. Muluku khorina, mapuro makhaani ootteettheya, nnakhala mapuro maalupale, a ikuru akhanle oowerya, okwannya wooyevaxa wa Muluku ti woowerya sothene, moone, wooyevaxa, okwannya wooyevaxa wa Muluku.

⁸ Tivo, moosuwela, tivo miyo kimpavela wookelihani mowaaminini vano, moosuwela wira yoowiirani etthu, ntoko muKristu. Moosuwela? [Muthukumano oniira, "Amen."—Mol.] Nyuwo khalayi mweettaka vathi *va* vamaroveni, ni marove othene ni etampi, ni nwuryaka, ni mmweettaka cuuku, ni—ni itthu sa molumwenkuni. Ahe, vamanlyanyu waamini wira Kristu oolevelela itampi sanyu, moovenya vasulu va itthu iyo. Vano nyuwo muneetta vasulu *va*, moone, vasulu va sothene iyo. Mwaha wa xeeni? Okhala wira munnaamini wira mwa muKristu. Vano okathi omukupalyanyu Kristu, ni Erooho Yoowaarya khurwa mwa nyuwo, vano nyuwo munnaamini Erooho Yoowaarya, eyo ennoovahani owerya wo weetta vasulu va enamuna yeeyo ya makhalelo a etampi.

⁹ Ahe, vano, etthu emosa paahi murinaanyu wira, wira nwelaxe mwa ovonihwiwa, okhalanaxa waamini paahi, paahi—mutthikele musukhumaka paahi wira ophuwe. Munnona? Nto eyo vo. Vano mwaawereiwaka, ni khamuhiyo muKristu, mukhale muKristu naanaano va, wira owerya iwo w'ovoniha okele mwa nyuwo, mwaha w'okhala muKristu. Nto eyo enimoovahani waamini wira mweette vasulu va etampi. Eyo enimoovahani waamini. Ni itthu sothene mumphavelaanyu, mmukwahani mu, siri mwa nyuwo naanaano va. Ni etthu emosa paahi murinaanyu wira omwaamini Muluku, onkumiherya itthu iyo sooreera mwa nyuwo, yoowo ori mwa nyuwo, ni Erooho Yoowaarya. Munniwa

saana vano? Munniiwa?

¹⁰ Kookupali wira Billy ookileela, nsana ohiyu, aahikiitthana khwira, “Murwe, voosiis’ula, vanci-enexa mwaha wa mutthu mmosa aarwiiye uupuwelaka wira naamukhalana miteko s’okokhorela esumana yeela, sa Ikanyeryo iye Thanu na piili.” Vano awo khimuruuha mwaana onwereiwa, kookupali. Nto nyuwo mwaari vaava naanaano, mulopwana, muupuwele, khimukhanle. . . Ohaana—ohaana okhala waamini wanyu wa mwaan’owo, akhala—akhala mwaana, mwanamwane.

¹¹ Masi vano mukihiye kikuxe Yoolempwa ekina, yakhala saana, okathi vakhani paahi. [Munna Neville oniira, “Mukeleleke ohoolo, Munna. Amen.”—Mol.]

¹² Muupuwele paahi, vano, mwa Ihapari sooreera, ninsoma kapiitulu 16, kookupali, ya Miteko, vaavo Paulo ni Sila yaarisaaaya mukhatteya ohiyu umosa. Ni awo yaahimaniwa mwaha wo wira yaarimoomola erooho yootakhala mwa mwali mmosa nahako. Ni yaari. . . Ni, owo, akhulupale awe yaahinanariwa mwaha wa yeeyo. Nto khumaniwa, khuheliwa mukalapooso sa muhina. Vano nto vairaly’aya siiso, okathi Paulo ni Sila yaavekelasaaya, vano Muluku khuveleeliha etetere y’elapo khuttikinya ekhatteya.

¹³ Namatthukela muFilipi, ory’ene mukhulupale a anakhotto, asuwelaka wira, ompweteya awawe—anamatthukweliwa awe, waari oliva ni ekumi awe mwaha wa anamatthukweliwa. Owo aahimukumiha xoowa awe ni aarowa wiisiiva, vano Paulo khwaattamela khwira, “Muhiisiive. Hiyo othene nri muumu.”

¹⁴ Nto mukhulupale ola, niireke, moonelo mmosa awo yaarinas’aya mwaha wa Paulo n’akina. Khino awo yaahiipasa masipo. Khino awo yaahikhalela onamoona, wala yaahiirasa etthu. Masi, enakhleru exeeni, awo yaanisuwela wira ale yaari athu oowaarya. Yaanisuwela wira yaahikhala etthu yoovirikana wa axilopwana ale. Okhala wira, naakuvaka, owo aahikoha, “Kiireke exeeni wira koopowe? Kiireke exeeni wira koopowe?”

¹⁵ Vano, Paulo khwira, “Mmwaamini Pwiya Yesu Kristu, nto nyuwo ni etthoko anyu munimooopowa.”

¹⁶ Ahe, vano, vakhala wira omwaamini Pwiya Yesu Kristu. . . Eyo khenihimya wira woopowa *wawe* waamooopola etthoko. Masi owo akhalanaru omwaamini Muluku woophiyerya woopowa wawe, onoowerya okhalana waamini omosaru wa etthoko awe. Nto etthoko awe ehaana okela, moone, etthu emosaru.

¹⁷ Siiso ntoko Yobi, ntoko saahimaly’aka ohiyu uwo, oGeorgia wu, vamuthukumanoni. Kiirale, “Yobi, iirale, ‘Vano, miyo nkinsuwela khama an’aka arimwiira etampi, masi ankhii awo yiira yiirale—ene etampi?’” Nto Yobi aarina etthu emosa yo wira, wira akhale naxariya, waari, ovaha mukuttho woopahiwa. Owo ohimmye wira aanvaha mukuttho woopahiwa, vakhala

wira an'awe yaarimwiira etampi, vano awo yaamuleleveliwa etampi aya. Ni yaari etthu yooreera tiithi owo wira. Owo tiithi onupuwela saana. Ninnaatthuna-tho muthinto yoowo wa axitiithi olelo. Ni Yobi aahivaha mukuttho woopahiwa. Eyo yaari maxakha awe ahinatthi opacerya.

¹⁸ Masi okathi an'awe othene vakhwiyaaya, ni ipwittipwitthi sawe sothene khupweteya, ni sothene saarinaawe, khukuxiwa, owo aakilaanthe veekuluni ya ettuurwa wiithela wa empa awe, aiwarakhulaka ni nipattuuxa na nivali.

¹⁹ Mooweha, nuuvira mahiku a maxakha awe, okathi Muluku opaceny'awe omuhokoloxerya-tho? Waakhenlyawe inyompe ikonto muloko, ni sikina, Owo aahihokoloxa vaara vaili. Ni aahaacererya vaara vaili ipwittipwitthi sawe, ni aahaacererya sothene. Masi mooweha? Nto Muluku nave-tho aahinvaha Yobi an'awe athanu n'aali. Nyuwo mootoko wuupuwela vaaryaa-vo? Mukuttho owo woopahiwa waahaakhula mwaha wa yaawo. Awo yaahoopowasa, Movuwani, amulipelekaka owo ophiya. Owo ori ni yaawo olelo. "Nyuwo ni etthoko anyu munimoopowa." Munnona? Vano, Yobi aahikhalana etthu emosa yo wira, wira akhale naxariya, waari ovaha mukuttho woopahiwa.

²⁰ Nyuwo muhaana etthu yo wira, wira mukhale naxariya, eyo ti, omwaamini Muluku. Okhala wira, mwaha wo wamini munnoopowa, mwaha wo waamini munnivonihiwa, mwaha wo wamini nyuwo munimwaakhela sothene sirinaanyu. Munnona? Onkhala mwaha wo waamini, wira munnaamini. Vano, "Mmwaamini Pwiya Yesu Kristu, nto nyuwo ni etthoko anyu munimoopowa."

²¹ Vano, mulopwana, mwakhalana mwaana va wira avekeleliwe, mwaamini, yeenyu. Miyo kiri va wira kihelele waamini waka ni wawinyu, nto ninimwaamini, vamosa, wira Muluku onoonvonihaha mwaan'owo.

²² Moone, nookhalana mwa hiyo owerya wo wira yeeyo. Mookhalana mwa nyuwo owerya wo wira yeeyo. Khula muKristu ookhalana owerya wo wira. Masi vano nawerya-ru paahi ophwanya. . . Owerya iwo oneettiheriwa ni nlamulo.

²³ Ntoko sinihimyakaaka imaara sinci-ene, eri ntoko elemelelo eneettiherya maasi, okhala wira nlo nlamulo. Elemelelo eneettiherya maasi.

²⁴ Nsuwa, nineettiheriwa ni e—ni e . . . ahiiso elapo ya vathi, ovilikeya wa elapo. Khamukhanle wiirihaka nsuwa wira etthu emosa, nto wira, "Kookupali wira kintthuna kirupe vakhani-tho. Mulipelele ewoora emosa." Khenrowa wira, moone, okhala wira nookhala nlamulo. Mwavara-ru muteko muttharihaka nlamulo nenlo, ahe, nto, sothene sinookhala saana. Mwarowa vooililini mwa okathi, munoowerya ovenya mwa okathi. Ni nyuwo mwa . . .

²⁵ Ntoko sirinaahu Ntthiya Superior, Ntthiya Ontario, Ntthiya Huron, ni Matthiya othene awo Maalupale osulu nno. Nookhalana ikitaare ikonto vaara ikonto sene sa etthaya oNevada, ni California, ni Arizona, ni Novo Meexiku, sinvoleliwa nthona, maasi awo, etthaya yaarowa olimmwa etthu. Vaamuweryaneya olyiha olumwenku wothene, iwo, vaakhanle wira maasi ala, osulu nno, yaamukhuruwelihwiwa iwe. Ni khiyaarowa ohaaxa vale, okhala wira ankhuma vephattuweloni. Akhuruwakaru, anoowela-tho eniivele, okhala wira elemelelo ennivarelela vaavale. Ahe, vano, mwawerya-ru ovara muteko muttharihaka nlamulo na elemelelo, munoowerya okuxa Matthiya ala Maalupale othene ni okhuwari elapo ele yothene iwe, ni olyiha olumwenku wothene, khaavo aarowa ovoliwa etala. Masi khimukhanle okilaathiki va ni wira, “Ayo. Kinnoona. Vekeekhai.” Muhaana orowa wira.

²⁶ Ahe, ti siiso ery’aya ni nlamulo na Muluku. Nlamulo na Muluku waaminii. Ni nookhalana waamini va, voosiis’ula, wira nivonihe khula eretta, wira niire khula etthu. Masi eneettiheriwa ni nlamulo, nto nlamulo nlo waaminii. Nlamulo na Muluku waaminii. Yesu ohimnye wira, “Sothene munthunanyu, mwaavekelaka, mwaaweryaka waamini wira munimwaakhela, munoophwanya.” Eyo eri vo. Tivo, ti waamini onneettiherya, ni waamini ninvahiwa siiso ntoko simphavelaahu. Vano, nihaana o. . . Muluku onaavaha amosa-amosa a hiyo waamini vakhani, akina waamini mukina. Kahi owerya wuulupale wa erimu murinaanyu. Okhala wira, vankhalaanyu muKristu, mo—mookhalana owerya, masi onoo halelani waamini wira nvarihete muteko owerya iwo.

²⁷ Nto vano, voosiis’ula, mwaarwaaka ovekeleliwa, muupuwele, Bibilia oohimya ela. Ela ekeekhaii. Yakopo 5:14, “Yakhala aretta, mwa nyuwo, awo ewiihane makhulupale a ekereja. Yaattikitthele makhura, ni yavekeleleke. Mavekelo a waamini anoowoopola aretta, ni Muluku onimwaavenxa.” Owo natirii, mwaaminiru. Tivo, moone, ovonihiwa onivaheriwa mutthu.

²⁸ Yaari mahiku a Yesu a oNasareti. Owo khaakhanle waavonihaka atthu voovirikana ni wawaya—voovirikana ni waamini waya. Owo iirale, “Miyo kinniweya, mwaaminiki vale. Mwaaminikiru wira kinniweya wira yeela, kinoowerya wira.” Mwaaweryaka waamini!

²⁹ Tivo, atthu amosa-amosa anaarihelela o—anaarihelela owerya w’ovoniha akina, anamalaleya ehapari. Kahi yeeyo. Owerya w’ovoniha ori mwa nyuwo. Ori mwa nyuwo. Awo ankhaliha ekarosa ohoolo wa ekhavalu. Namalaleya khorina owerya wo ovoniha.

³⁰ Erooho Yoowaarya t’erina owerya wo ovoniha, ni nyuwo muhaana Erooho Yoowaarya. Mwiri owo, mukhaani ti nyuwo,

ni itthu sothene mumphavelanyu siri mwa nyuwo. Tivo, nto, mpacerye owurya mwa natiri a Muluku, mwiiraka, “Eyo ekeekhaii. Muluku ohimye wira aamukivoniha. ‘Makhwatta Awe aakivoniha.’” Eyo eri vo. Moosuwela eniiraanyu? Munoopacerya ophuwiha ovona, ti yeeyo tu. Munnona? Vano nto, akina annoowerya woona etthu murinaanyu.

³¹ Vano ele ekhanle, “Waamini ti ekeekhayi ya itthu sinlipelelahu, wooniheriwa wa itthu ihinooneya.”

³² Kaamuwerya ophatteya vale mwiri owo mukhaani. Nkinoona masa, masi awo ari muhina mmwe. Mwiri ule mukhaani onnisuwela wira ari mwemmwe. Vano owo onoopacerya owurya, osukhumaka ni osukhumaka, okhala wira onnisuwela, “Eri mwa miyo. Kinookumiherya va nuvira okathi. Mukivahe okathi vakhani paahi. Mukitthuniherye okathi vakhani paahi.” Owo onootthikela owuryaka paahi. “Ayo, miyo koosuwela wira masa ari mwa miyo. Miyo kinimwiima, nuvira okathi vakhani.” Ni muhiwehereryaka, va animoorwa. Va anoorwa masa, okhala wira owo aahaamini wira yaari mwa yoowo.

³³ Nto nyuwo mwaaminiru wira owerya wa Erooho Yoowaarya ori mwa nyuwo, wira woovoniheni, eyo vo. Mutthikele musukhumaka paahi. Munnona? Mookhalana waamini. Khivanweryaneyya woona ikhumelo naanaanoru. Khamunoona.

³⁴ Vano, moone, Yakopo oomukhalihya naxariya Abrahamu mwaha wa miteko sawe. Paulo omukhalinhe naxariya Abrahamu mwaha wo waamini wawe. Ninihimya exeeni nto, mwa seiyo piili? Abrahamu aalavula mwaha wa etthu. . . Miyo kinihimya, Paulo aalavula ele Muluku oonaly’awe mwa Abrahamu. Nto Yakopo aalavula ele atthu yoonalyaaya mwa Abrahamu. Munnona? Vano, munnona?

³⁵ Tivo, Muluku aahisuwela wira, mwaana ohinatthi orwa, wira Abrahamu aahikhalana waamini. Nto Abrahamu aahimooniherya Muluku, airaka ntoko wira (owo) mwaana aarowa oyariwa owo oryeene oohiyara. Owo khaarina aana. Mmirimani wa amwaar’awe mwaahikhwa, ni owo khaayara. Masi, nnakhala vo, owo aahisuwela, “Mmwe nipuro nlo mwaahikhala mwaana.” Moone, owo aakhala anwuryaka natiri, amulipanaka El Shaddai muulupale a Muluku, *Nipele*. Alipanaka vaavo, awuryaka, asuwelaka wira Muluku aamunvaha; aanisuwela wira aari natiri, ni Owo aahaana wira.

³⁶ Ni hiyo n’ana a Abrahamu. Tivo nrowe nimulipane natiri Awe, ni nivarelele vaavo, nisuwelaka wira Muluku onimwiira. Owo ohimye siiso. Munnaamini yeeyo vano? [Muthukumano oniira, “Amen.”—Mol.]

³⁷ Vano aretta ethataane va epantte emosa wala ekina, ale anthuna ovekeleliwa. Ni arwaaru mukhulupale va aattikitthele makhura, miyo kinimwaavekelela, ni ninimwaamini wira

Muluku onoonvoniha khula mmosa a awo. “Mwaaweryaka waamini.”

³⁸ Teddy, muri vayi? Murwe epantte ela ya moonoo woolopwana. Ti yooreera. Ni kintthuna wira murumihe *Waamini Paahi*.

³⁹ Nto awo arwaaka, nrowe nuuramihe miru sahu, muthukumano wothene, ni nikhale naavekelelaka atthu ala anrwa.

⁴⁰ Tith’ihu a Wirimu, hiyo ninnaaruuha wa Nyuwo, voosiis’ula, mwa Nsina na Yesu Kristu, atthu ala, oohaawaseya anwereiwa, ni anihaaxeya ni mukhalelo ola wowoopiha, ni wootakhalaha. Miyo kinniwaaminini, Pwiya. Miyo—miyo koosuwela wira Masu Anyu t’ekeekhai. Awo t’ekeekhaixa! Awo khakhanle ovonyaka, okhala wira Awo Masu a Muluku Ahinimala ni a mahiku othene. Awo t’owerya sothene, ntoko Muluku siry’awe, okhala wira Awo epantte ya Yoowo. “Wopaceryani naari Nsu, nto Nsu naari ni Muluku, ni Nsu naari Muluku. Vano Nsu khukhala erutthu khukhala ni hiyo.” Vano, hiyo ninnaamini eyo, Pwiya, ni murima ahu wothene, ni munep’ahu wothene, ni sothene siri muhina mwa hiyo. Hiyo ninnaamini.

⁴¹ Ni koophavela, mwa enamuna yookhweya, ntoko wa mwaana, wira kiwooniherye eyo atthu, wira awo yiiwe saana ni asuwele wira Owerya wa Muluku ori mwa yaawo. Awo yaaweryaru paahi okhalana waamini waya n’utthara sooruma sa Muluku!

⁴² Ti siiso awo yoopoliwaaya. Awo ahoorwa khulapa itampi saya, khupatisiwa mwa Nsina na Yesu Kristu, voolikana ni Bibilia ola, Miteko 2. Vano nto Petru khwira, wira, “Munimwaakhela yoovaha ya Erooho Yoowaarya.” Nto Eyo khurwa, voolikana ene, okhala wira Awo Masu a Muluku owooniheriwa.

⁴³ Ahe, vano, etthu emosaru, Tithi, hiyo noosuwela wira ekeekhaii, okathi onaattikitthelahu aretta ni makhura, n’uvekela. “Mavekelo o waamini anoowoopola aretta. Muluku onimwaavenxa.” Muluku, khula mmosa akhume valtaari va, nipuro nla voosiis’ula, ooteeliwa murima ni atthapaka, wa osuwela wira Muluku ohaavoniha. “Rowakani, nvonihewe.” Maana hiyo ninnaavahererya wa Nyuwo vano, mwa Nsina na Yesu Kristu.

⁴⁴ Ni wira khula mmosa avonihewe, avare yoowoona, etthu enihimyaya, ntoko Abrahamu, aaitthanne itthu iye sihikhanle ntoko saakhanle, voohicala iye sikhanele ikhumelo, eyo kherina naata ni waamini. Ikhumelo khasihiyo hat’etthu. Waamini woovara. “Nto waamini ti ekeekhaiyi ya itthu sinliplelaahu, ni wooniheriwa wa itthu ihinooneya.” Muluku, eyo ekele voowiixerya mmurimani mwaya, okhala wira awo annootthunani Nyuwo.

45 Kinrowa ntoko murumeyi Anyu oowiiyeviha, wira keemele va ni arumeyi akina, ni onvekela Muluku wira ahele mmurimani mwahu mwaha wa atthu ala anwereiwa. Hiyo ninvekela mwa Nsina na Yesu. Amen.

46 Ookhala ohimye wira Munna Estle Beeler aari mpaani mu. Ni kookupali wira ookhala murumeyi mukina va, eettihenrye mmavekeloni, voosiis'ula. Naatthuna waavekela arumeyi othene va, anakhaleru ani, wira arwe nno yeemele waltaari va ni hiyo, okathi, vakhani paahi, xontte, axinna. Nto alopwana. . . Munna Ben, kooxukhuru. Murwe mweemele va, waltaari nno, wira niwerye okhalana mavekelo n'atthu ala, owiixaatherya matata.

47 Vano, nirumihwaka nsipo. Ni arumeyi arowaka vooপুরoni vava va, tivo hiyo, khula mmosa, niwerye owiixaatherya matata aretta.

48 Nrowe noone, akhuruwaka vale vamwaako. Kinnimoona Mulopwana mmosa arwaaka, khaari oovirikana ni mutthu mukina. Owo aari Mutthu pure paahi, ooyeva erutthu, ootteettheya saana. Ninnimoona Owo awehaka, maitho Awe vasulu va—yookhumelela eniiraneya ohitto wu mukhatoni. Yaari arummwa Awe. Awo yaahikhalana mmiravo mmosa iwe, aarina ecile, ni vekeekhai yaahimya wira, “Munvonihe, Pwiya! Munvonihe!”

49 Masi, moone, ohimya paahi, “Munvonihe, Pwiya, munvonihe,” khenvara etthu. Eyo khenvara etthu tu. Ehaana okhala etthu enlipiherya eyo, “Munvonihe, Pwiya, munvonihe.” Munnona? Ni miyo kaweryaru owaaminihani yeeyo, ni waamini eyo ni murim'anyu wothene, munoorowa ovonihiwa, kaweryaru tthiri woophiiheryani wona yoowoona.

50 Vano nwehe, awiixutti ale yeemenle-ene vale, khino emuttikinyaka, khino yiilipihaxaka, “Mwaamini, Munna! Mwaamini! Aleluya! Mwaamini! Munvonihe, Pwiya! Munvonihe!” Masi xetwani aahanle vaavale vale, okhala wira khaawerya ophwanya waamini onipiherya vale wira omukumihe.

51 Masi va onoorwa Mmosa okhuruwaka vamwaako. xetwani owo amalakaru osuwela wira Ole aari oovirikana vakhani n'axilopwana akina! Munnona?

52 Vano, owo ti muthinto wa axilopwana ontthunaahu wira okhale iwe, ntoko Pwiya'ahu Yesu. Ayo. Khaninrwa paahi wira okhale othweela, masi ninrwa, nimphentaka Muluku ahu, osuwela wira noorummwa orowa wira yeela. Nno ti orummwa wahu.

53 Vano, Owo vamwaattamenlyawe tiithi, kinoona wira ti vaavo nsipo nla nilempwaya-vo, noopakiwa ni Masu, owo khwira, “Pwiya, mummorele ikharari mwan'aka, okhala wira khonreere ohaaxiwa ni xetwani.” Khwira, “Onnimurihela vaikho, okhulumuwa, ni siiso.” Owo khwira, “Miyo kihaaruuha

awiixutti Anyu, masi awo khawenrye onvoniha. Masi miyo—miyo—miyo kuupuwela. . .”

54 Owo khwira, “Miyo kinniwerya, mwaaminikiru. Vano, kookhalana Owerya mwa Miyo,” Owo khwira, “wo wira, mwaaweryaka waamini yeeyo.”

55 Muluku aamutthuniherya wira atthu awo arina kankuru akilaanthe va voosiis’ula, ankhalaka voolilini, oowaataleleya voolilini ni kankuru, ni kankuru a mphomeni, eretta, ohaaxeya, Muluku aamwaavoniha awo oovireni nyuwo? Ti voohaanyihereya. Nnari. Munnona? Vano, Owo khonvonya. “Miyo kinniwerya, mwaaminiki vale.” Owo ohimmye exeeni?

Maana sothene sinniweryaneya, paahi. . .

Vano, Munna Tyler, rwaakani. . .? . . .

Vano waamini paahi, waamini paahi,

56 Vano, kivekelaka, kintthuna wira nwiixaatherye matata atthu. Etthu p’itthu awo antthunaaya, . . .? . . . ni arowe attharaka eliinya.

57 Munna Neville, nyuwo muttikitthele makhura, ni axinna. . .? . . .

58 Kinaatthuna atthu othene, vamuthukumanoni, ni muru anyu wowuurama vano. Atthu othene avekelaka voowiixerya.

Paahi. . .

59 Pwiya, mmoriwe ikharari, kinnivekela, ni mwaavonihe atthu ala, mwa Nsina na Yesu Kristu. Amen.

Mwa Nsina na Yesu a oNasareti. . .? . . . [Nipuro vahiitthu mufiitani—Mol.]

60 Ancine, athataanne, yaawehaka, yoonaka eyaakhulelo aya ya moota awo yaary’aya, woona moota anaakhulaaya eyiirelo. Munnona? Yookhala etthu ene ntoko eyiirelo, awo aavenya khukelela ohoolo. Etthu ekina, moota awo anaakhulaaya eyiirelo eyo awo yiiralyaya. Awo vammalaaya waamini, wira, yavekeleliwa, anoovonihiwa, nto nwehe eyaakhulelo ya eyiirelo aya.

61 Vano, pastore ahu ookhalana mutthaka wooreera wa hiyo, kookupali, voosiis’ula.

62 Etthu emosa miyo kaatthunaaka ohimya okathi vakhani, aari mwali mmosa muKatolika eemenle vale waltaari. Mahiku vakhani avinre owo aari owannyaka, owo ni aiy’awe. Ni woovira okathi kinaasuwelaaka aiy’awe. Ni—ni yaahikhala etthu yiiraneiyee okathi waakilaanthe ahu nirineene nvaanelo w’omeekha.

63 Ti vaavo hiyo naarinaahu yoowoona. Ti vaavo hiyo. . . kaanikhalanaka va mukereja, masi yaamukuxaka voosiisu, ni siiso. Nto siiso waari vaavale.

64 Miyo khuhihimya etthu, okhala wira oryeene mwali, etthu ekina, okathi wothene aari mukereja Katolika, ni sikina. Masi owo aaronwe olavula nipuro n'ame awe. Nto okathi ene yoowo, kaahona yoowoona ya ame awe. Khumuhimeerya ole waari mukattyamiho w'ame awe, ni khumwaalikelela, ni mukhalelo w'ame awe. Vekeekhai, owo aari mphuki a yeeyo, vakhala wira yaari ekeekhai wala nnari. Miyo kiira kihinatoko owoona ame awe, kookhalaru. Owo onnisuwela eyo.

65 Nto mwali, voosiis'ula, aahoorwa waltaari nno khweemela, wira alape, ni amukupali Kristu ntoko Moopoli awe. Owo iirale eyo waltaari, voosiis'ula.

66 Munna Neville, ahisuwelaka, khumuttikitthela makhura. Moota—moota Muluku onvaraawe muteko! Omuttikitthela makhura, a aretta. Masi nwehe weetta wa Erooho Yoowaarya. Vano, okhalaka wira owo aari oottikittheliwa, vekeekhai khaawereiwa, masi oottikittheliwa. Munnoona moota eniirihaaya itthu sothene ovara muteko oratteene? Owo eemenle ntoko muKristu vano, vamanly'awe okhala ele enaamini ahu okhala muKristu. Vano, owo iirale, “Mwaamuwerya waavekelela ame aka? Awo anoowereiwa.” Aryeene yaawo. Tivo makhura oottikitthela aheleliwaaya khalayi-ru.

67 Miyo khuupuwela, moota ephwanenly'aya, eyo, moone, mutthu onaammala-ru woopowa. Kristu ooneemererya hiyo othene. Owo onniweemererya othene. Mwali ola amalakaru okhala muKristu, vano owo ontthuna omweemererya mutthu, nave, yooniheryaka wira Erooho ya Kristu ennikela mwa hiyo okathi onoopowa-ahu vekeekhai. Vano, eyo ti yoorera saana. Miyo—miyo vekeekhai kinnixukhurela yeeyo, erooho ele y'eKristu yooloka yo waamini. Vano, muupuwele paahi.

68 Vano, wa mwaamuthiyan'ola, owo ori vaava nipuro nlo, ni wa muhano mukina muKatolika ovinre. Nto miyo kaatthuna kihimye moolumo ala, okathi vakhani kihinatthi onvahererya muteko pastore ahu, moone, t'ila:

69 Vano, ekereja Katolika yaahitoko okhala ntoko ekerej'ela. Mwatthika vale mmusoma Bibilia, yoowo onimwaamini ahu, ni moosuwela wira ekereja Katolika yaari Ekereja yoopacerya. Eyo ekeekhai. Masi eyo eroohiya Miixuttiho Saya. *Ola* waari mwixuttiho wa ekereja Katolika. Masi, moone, awo aakhalana iliivuru imiya thanu na mosa n'itthu sikina mapaapa ni akina alempe-aya, sikhante soowaarya wa awo ntoko Bibilia ola.

70 Tivo, moone, ele ekhanle ela, nyuwo khamurukununwe. Etthu mwiiraly'anyu, nyuwo muroorukunxa murima paahi. Munnona? Vano mwakuxa... Vekeekhai, kinoona wira khino amosa-amosa a nyuwo, ala aili, voosiis'ula, yaari athiyana. Siiso akhanle-ene axilopwana amosa-amosa aKatolika akilaanthe va.

71 Mwamutthikelaruru wahala a ekereja, mwamukoha namukuttho anyu, “Mwiirelo wa arummwa ala mBibiliani mu,

eyo yaari enamuna. . . Awo yaari aKatolika oopacerya?” Owo onimwiira, “Ayo.” Nto eyo ekeekhaii. Awo yaari yeeyo. Vano, awo, nkawehani muthinto xeeni w’etiini awo yaarinasaaya. Awo yaathukumana nipuro nikhaani, noowiiyeviha. Awo khanahimyeke wira, “Mutteeliwe Maria” wala “Axitithi ahu.” Eyo ekano ya ekereja. Awo yaahimye-ni? Awo yaamuttotopela Muluku. Awo yaamukhuwela. Yaamunla.

⁷² Nkawehani va mwa Miteko 2, okathi Murummwa Petru oowaarya, ni Yakopo, ni Yohani, ni othene yaarisaya vama. Bibilia ohimye wira awo yaahilavulasa ilavulelo. Ni yaahikhuwelasa, ni yaahiira vo—voosareyaxa Erooho Yoowaarya mpakha yiirasaaya ntoko yaarooopalasiwa, ni hata mpakha olumwenku wa ota okoha, “Othene ala khahapalasiwe?”

⁷³ Vano nto Petru, murummwa, Petru Oowaarya oottittimiha, veemenlyawe, khwira, “Alopwana n’axinna, atthu ala khahapaliwe, masi awo aaroosareya Erooho,” ntoko bi—ntoko Bibilia sihimaly’awe. Vano, eyo yaari ekereja Katolika yoopacerya, voolikana ni mwiixuttiho aya.


⁷⁴ Vano, moone, nuuvira miyaakha imiya piili, alipa-oottittimihiwa khupacerya okela mukereja. Vano awo yiirale exeeni? Awo aaroopaka mutthenkeso aya woopacerya Muthukumano w’oNicea, 606 D.C. Awo khupaka. . . Okathi Muthukumano w’oNicea wiireiye aya oNicea, Rooma, awo khupacerya okhalana atthu othene aalupale oottittimiheya, vano awo *khukhalaha* ekereja, *khupaka* ekereja.

⁷⁵ Nuumala yeeyo, khukawanyeya imaara xexe wala thanu. Awo khuvira—awo khuvira okhuma yeeyo, khukelela pixipu; okhuma pixipu, khukelela paapa. Okhuma yeeyo, khukhumelela aKreku aOrtookisa ni oohiyana-hiyana, mpakha okawaneya paahi, mpakha vaavo muniwoonanyu olelo. Eri mwa khula enamuna yo okawanyeya.

⁷⁶ Masi etthu emphavelahu wira, mpatthani aka muKatolika. . . Moone, hiyo n’a aKatolika, nave, hiyo n’ale oopacerya, aKatolika a epacerelo. Ni ekereja ntoko annihaaya vano, vanci-enexa, ninsuweliwa ntoko aPentekosite, okhala wira ninnaamini eparakha ya Pentekosite.

⁷⁷ Ti vaavo ekereja Katolika etthokihwaya. Ni mmitthenkesoni mwahu sa Pentekosite, olelo, vaakhanle—vaakhanle wira olumwenku ula waamukhala-tho miyaakha imiya thanu, mutthenkeso ola wa Pentekosite waamukhala wookhaleleyaxa ovikana ekereja Katolika y’oRooma sikhanyaya olelo. Enootepa erowaka ottaiwene, enamuna emosaru. Ni yaaitthokihaka, amphiyerya okhala ilooca. Vano nto iyo khukhala elooca paahi, ni mamempuru, ni minepa soohirukunxa murima.

⁷⁸ Wa oophentiwa aka, axinna oophentiwa alopwana ni athiyana, wa nyuwo othene. Ntoko murumeyi a Muluku,

miyo nkinatoko ohimya ela khalayi, molumwenkuni, mukereja mu, nkinatoko ohimya. Masi ntoko profeta a Apwiya, miyo kinimooleelani, “Nno Waarya. Mweetteke mwa Yoowo.” 

61-0813 Waamini
Branham Tabernacle
Jeffersonville, Indiana wAmerika

EMAKHUWA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org